


Los ntawm Thawj Tswj Hwm
Thomas S. Monson



“Ib Yam Li Kuv Hlub Nej”

Ob peb xyoo tas los lawm ib tug phooj ywg hu ua Louis qhia ib zaj zoo heev txog nws niam tsev uas ua siab ntev thiab muaj siab mos siab muag. Thaum nws tso lub ntiaj teb no tseg, nws tsis muaj nyiaj txiag los ua cuab yeej cuab tam rau nws cov tub cov ntshais tiam sis nws muaj ntau yam zoo xws li nws tus yam ntxwv, kev txi, thiab kev mloog lus.

Tsis ntev tom qab tau hais lus hauv lub ntees tuag tas thiab nws tsev neeg tau tawm qhov chaw faus neeg mus lawm, lawv mus saib tej yam khoom uas lawv niam tau tseg cia rau lawv. Louis nrhiav tau ib daim ntawv thiab ib tug yuam sij. Cov lus hauv daim ntawv qhia tias: “Nyob hauv chaw pw ntawm ces kaum, nyob hauv lub tub rau khaub ncaws sab hauv qab, muaj ib lub thawv me me. Lub thawv no muaj qhov uas kuv lub siab saib muaj nqi ntau tshaj. Tus yuam sij no yuav qhib lub thawv no.”

Lawv txhua tus xav paub seb lawv niam saib dab tsi rau nqi npaum li no kom muab tseg cia li no.

Lawv twb nqa lub thawv thiab maj mam siv tus yuam sij muab qhib. Thaum Louis thiab lawv saib muaj dab tsi nyob hauv lub thawv, lawv nrhiav tau ib daim duab txog txhua tus me nyuam, nrog rau tus me nyuam lub npe thiab hnuv yug. Ces Louis rho ib daim ntawv xa rau tus yus hlub uas nws tau ua puag thaum nws yog ib tug me nyuam. Txoj kev sau ntawv yeej tsis zoo, ib yam li ib tug me nyuam yuav sau, es nws pom tias nws yog tus uas sau ntawv, nws cia li nyeem cov lus uas nws tau sau 60 xyoo ua ntej hais tias: “Niam, kuv hlub koj.”

Ua rau lawv lub siab mos muag, hais lus yau yau, thiab los kua muag. Qhov uas lawv niam saib rau nqi tshaj yog nws

tsev neeg uas nyob mus ib txhis. Nws tsev neeg muaj zog vim nyob ntawm lub hauv paus khov kho uas yog kev hlub.

Nyob hauv lub ntiaj teb no, yus tsev neeg yeej yuav tsum muaj lub hauv paus ntawm kev hlub no. Thiab neeg ntiaj teb yeej yuav tsis muaj cov uas coj yam ntxwv zoo txog lub hauv paus ntawd tshaj Tsoom Haiv Neeg Ntseeg tej tsev neeg uas muaj kev hlub ua lub ntsiab ntawm lawv tsev neeg lub neej.

Rau peb cov uas hais tias peb yog cov pab coj ntawm tus Cawm Seej Yexus Khetos, Nws tau qhia peb li no hais tias:

“Nim no kuv yuav muab ib txoj kev cai tshiab rau nej, Nej ib leeg yuav tsum hlub ib leeg ib yam li kuv hlub nej. Nej ib leeg yuav tsum hlub ib leeg.

“Yog nej ib leeg hlub ib leeg, sawv daws thiaj yuav paub hais tias nej yog kuv cov thwj tim.”¹

Yog peb yuav ua raws li lo lus txib kom ib leeg hlub ib leeg, peb ib leeg yuav tsum pab thiab saib taus ib leeg, qhia tias peb niaj hnuv muaj kev hlub. Kev hlub yog kev ua siab zoo hais lus, kev ua siab ntev, kev pab lwm tus, kev to taub, kev zam txim. Nyob ntawm peb txoj kev nrog lwm tus neeg sib raug zoo, tej yam no thiab lwm yam li no yuav pab txoj kev hlub loj hlob tuaj hauv peb lub siab.

Thawj Tswj Hwm Gordon B. Hinckley (1910–2008) qhia tias: “Kev hlub . . . yog pob kub nyob ntawm zaj sawv qhov xaus. Tiam sis tsis yog qhov xaus ntawm zaj sawv xwb. Kev hlub yeej nyob ntawm qhov chiv thiab, es los ntawm kev hlub ntawd los muaj ib qho zoo nkauj uas hla ntuj thaum huab cua tsis zoo. Kev hlub yog kev puaj phais uas cov me nyuam quaj vim lawv xav muaj, yog qhov uas cov tub hluas ntshais hluas tau, qhov uas khi ib nkawm niam txiv ua ke,

thiab qhov uas pab kom tsis txhob muaj kev sib cav sib ceg nyob hauv tsev; kev hlub yog kev kaj siab lug ntawm cov neeg laus, yog kev tshav ntuj ntawm kev cia siab uas ci ntsa iab thaum neeg tso lub ntiaj teb no tseg. Cov uas muaj kev sib hlub nrog lawv tsev neeg, phooj ywg, cov ntseeg, thiab cov neeg zej zog yeej nplua nuj.”²

Kev hlub yog lub ntsiab ntawm txoj moo zoo, tus cwj pwm zoo tshaj plaws uas tib neeg coj tau. Kev hlub yog kev kho teeb meem ntawm tsev neeg, zej zog, thiab tej haiv neeg uas muaj mob. Kev hlub yog kev luag nyav, kev voj tes, kev ua siab zoo, thiab kev hais lus zoo txog lwm tus. Kev hub yog kev txi, kev pab lwm tus, thiab kev tsis xav txog yus tus kheej.

Cov txiv tsev, cia li hnuv nej cov poj niam. Ris lawv txiaj thiab hwm lawv. Cov muam, cia li hlub nej cov txiv. Saib lawv rau nqi thiab txhawb nqa lawv.

Cov niam tsev txiv tsev, cia li hlub nej cov me nyuam. Thov Vajtswv pab lawv, qhia lawv, thiab ua tim khawv rau lawv. Cov me nyuam, hlub nej niam nej txiv. Saib lawv rau nqi, ris lawv txiaj, thiab mloog lawv lus.

Yog tsis muaj Khetos txoj kev hlub dawb paug, Maumoos qhia hais tias, “[peb] tsis muaj nqis dab tsi.”³ Kuv thov Vajtswv kom peb yuav ua raws li Maumoos cov lus ntuas kom “thov Vajtswv kawg siab kawg ntsws kom [peb] yuav muaj Khetos txoj kev hlub dawb huv, uas nws tau muab rau tag nrho cov uas coj raws nraim li nws Leej Tub, Yexus Khetos; xwv kom [peb] yuav rais tau los mus ua Vajtswv tej tub; kom thaum nws yuav tshwm los peb yuav zoo li nws.”⁴

LUS CIM

1. Yauhas 13:34–35.

2. Gordon B. Hinckley, “And the Greatest of These Is Love,” *Ensign*, Peb Hlis Ntuj 1984, 3.

3. Maulaunais 7:46; kuj saib nqe 44.

4. Maulaunais 7:48.

QHIA LOS NTAWM TSAB XOY NO

Thawj Tswj Hwm Monson qhia peb txog qhov uas peb hlub lwm tus zoo li Yexus Khetos, xws li nyob hauv tsev, tseem ceeb npaum li cas. Xav seb puas tsim nyog hais cov uas uas koj mus xyuas kom lawv tsev neeg sib sau ua ke thiab sib tham txog tej yam lawv ua tau kom ib leeg hlub ib leeg. Tej zaum koj yuav xav yaum lawv xaiv ib lub tswv yim thiab npaj ua qhov ntawd ua ke hauv lawv tsev neeg. Piv txwv hais tias, tej zaum cov nyob hauv tsev neeg yuav xav pab lwm tus hauv tsev neeg ntsiag to txhua lub lim tiam. Tej zaum koj yuav xav nug lawv seb qhov uas lawv sim ua raw li lawv lub hom phiaj ua rau lawv txoj kev hlub hauv tsev loj hlob tuaj.

COV HLUAS

Thov Vajtswv Kom Nyob Kaj Siab Lug

Los ntawm Sarah T.

Kuv niam kuv txiv pheej muaj kev sib ntsib tom qab lub sij hawm mus lub koom txoos, kuv thiaj li saib kuv peb tug nus thiab pab lawv ua su noj—ntshe lawv yeej siab lub thiab tshaib plab heev. Feem ntau yog lawv pib sib cav sib ceg, kuv kho tau ib qho teeb meem sai heev. Tiam sis tej lub sij hawm nyuaj rau kuv pab lawv kom kaj siab tom qab lawv pib sib cav vim kuv tab tom ntshov siab heev.

Muaj ib zaug thaum tav su, nyuaj heev rau kuv cov nus sib raug zoo. Kuv kawm tias thaum kuv sim pab lawv nyob kaj siab lawv haj yam sib cav vim ntshov siab heev. Yog li ntawd kuv ua su rau kuv tus kheej thiab tsum tsis hais lus ntxiv. Ces, kuv hais tias, “Kuv yuav thov Vajtswv. Nej puas kam nyob twj ywm tau ib me pliag?” Thaum lawv nyob tus me ntsis, kuv tau thov Vajtswv foom koob hmoov rau cov zaub mov. Ua ntej kuv xaus kuv zaj lus thov, kuv hais cov lus no, “Thiab pab peb ua kom lwm tus nyob kaj siab lug.”

Thaum xub thawj, zoo li lawv tsis mloog lus thiab lawv rov qab pib sib cav dua. Kuv nyuaj siab tiam sis kuv paub tias kuv yuav tsum hlub lawv thiab coj tus tus vim kuv nyuam qhuav thov Vajtswv kom nyob kaj siab lug. Ib me pliag tom qab ntawd, ua rau kuv nyob tus tus. Kuv noj mov es tsis hais dab tsi, thiab kuv cov nus tsum tsis sib cav ntxiv. Kuv kawm tias kev kaj siab lug yog Vajtswv tej lus teb rau kuv tej lus thov. Kuv tau thov Vajtswv kom pab lwm tus nyob kaj siab lug, thiab kuv Leej Txiv Saum Ntuj Ceeb Tsheej tau pab kuv nyob tus tus thaum kuv raug ntxias kom qw nrov. Kuv paub tias Nws yeej pab tau peb nyob kaj siab lug.

Tus sau zaj no nyob hauv Arizona, USA.

COV ME NYUAM

Qhov uas Muaj Nqis Tiag Tiag

Thawj Tswj Hwm Monson hais ib zaj dab neeg txog ib tug niam tsev uas muaj ib lub thawv tso khoom uas muaj nqi heev. Thaum nws cov me nyuam qhib lub thawv ntawd, lawv nrhiav tau tej daim duab txog lawv tus kheej. Qhov uas lawv niam saib rau nqi tshaj yog nws tsev neeg!

Qhov uas muaj nqi tiag tiag tsis yog kub los yog cov hlaws—yeej yog cov neeg uas yus hlub. Koj hlub leej twg? Cia li kos duab txog ib lub thawv tso khoom uas muaj nqis uas muaj lawv daim duab los sis lawv tej npe nyob hauv lub thawv.



Khetos txoj Kev Theej Txhoj Yog Puav Pheej Qhia txog Vajtswv txoj Kev Hlub

Ua tib zoo thov Vajtswv kawm tej yam no thiab nrhiav kev tshoov siab seb koj yuav tsum qhia dab tsi.

**Kev Ntseeg, Tseeg Neej,
Kev Pab**

Qhov uas peb to taub tias peb Leej Txiv Saum Ntuj Ceeb Tsheej txib Nws Tib Leeg Tub kom peb thiaj yuav tsis txawj tuag thiab yuav txais tau txoj sia nyob mus ib txhis pab peb paub Vajtswv txoj kev hlub rau peb uas tsis paub kawg. Peb tus Cawm Seej yeej hlub peb thiab.

“Tsis muaj ib yam dab tsi yuav cais tau peb tawm ntawm Yexus Khetos txoj kev hlub? . . .

“Rau qhov kuv paub tseeb hais tias tsis muaj ib yam dab tsi yuav cais tau peb ntawm Vajtswv txoj kev hlub, tsis hais kev tuag los sis kev ua neej nyob, cov tim tswv los sis cov uas muaj hwj chim kav saum nruab ntug, nim no los sis yav tom ntej,

saum nruab ntug los sis hauv nruab tiv txwv, los sis ib puas tsav yam uas yog Vajtswv tsim yeej tsis muaj ib yam dab tsi cais tau peb ntawm Vajtswv txoj kev hlub uas nws pub Yexus Khetos uas yog peb tus Tswv los tuag theej peb lub txhoj” (Loos 8:35, 38–39).

Hais txog Yexus Khetos txoj Kev Theej Txhoj, Txwj Laug D. Todd Christofferson los ntawm Pawg Kaum Ob tug Thwj Tim hais tias: “Tus Cawm Seej txoj kev raug txom nyem hauv Khexamenes thiab Nws txoj kev nyuaj siab saum tus ntoo khaub lig txhiv peb dim vim nws them tus nqi ntawm kev txim lij. Nws muab kev siab hlub thiab zam txim rau cov uas hloov siab lees txim. Yexus Khetos txoj Kev Theej Txhoj kho thiab nplij peb lus siab kom them tus nqi uas kev txim lij yuav tsum them rau peb thaum peb raug txom nyem tiam sis tsis tau ua txhaum. ‘Vim saib seb, nws yuav nyiaj tej kev mob ntawm neeg sawv daws, muaj tseeb tiag, yuav nyiaj tej kev mob ntawm txhua tus neeg, tsis hais poj niam, txiv neej, los sis me nyuam yaus, uas yog Adas tsev neeg’ (2 Nifais 9:21; kuj saib Amas 7:11–12).”¹

Khetos tau “muab [peb] txaug rau saum [Nws] tej xib teg” (Yaxayas 49:16). Linda K. Burton, Koom Haum Niam Tsev tus Tuam Thawj

Tswj Hwm, hais tias, “Txoj kev hlub loj heev no yuav ua rau peb xav txhos caug ntua ua peb Leej Txiv Saum Ntuj Ceeb Tsheej tsaug uas Nws tau txib Nws Tib Leeg Tub uas zoo tag nrho los raug kev txom nyem rau peb tej kev txhaum, kev mob siab, thiab txhua yam uas zoo li tsis ncaj ncees hauv peb lub neej.”²

Vaj Lug Kub thiab tej Ntaub Ntawv Xov Xwm Ntxiv

Yauhas 3:16; 2 Nifais 2:6–7, 9; reliefsociety.lds.org

LUS CIM

1. D. Todd Christofferson, “Kev Txhiv Dim,” *Liahona*, Tsib Hlis Ntuj 2013, 110.
2. Linda K. Burton, “Puas Muaj Kev Ntseeg ntawm Yexus Khetos txoj Kev Theej Txhoj Sau Tseg rau Hauv Peb Tej Siab?” *Liahona*, Kaum Ib Hlis Ntuj 2012, 114.

Xav Txog Qhov No

Peb yuav ua li cas kom qhia Vajtswv thiab Yexus Khetos tias peb hlub Nkawd thiab ris Nkawd txiaj vim peb muaj tus Cawm Seej txoj Kev Theej Txhoj?